

Hadékhú Pol ingi Baranabas

Emisiyongo inno, ifak ílobhuneh a gubaarhu Sol. Lentaarenj mara fam, Sol ayehenyehen m'anfiyumne Yensa Jerusalem. Úmár asosor fo jamaño ambujne Etiyen. Kanda f'anane hadéko Damas afég jiyaan jíde j'afúrumor a raafo k'afég Yensa, k'ayennehin síngiirhu Yensa. Angu, Sol afiyumfiyum Yensa.

Guliiho, m'anfiyumne Yensa Jerusalem dómárononj mara Sol afiyumfiyum Yensa. Anlah kara bujodhánin gañane. Kanda údiigeeno m'aretuhne Baranabas afiyumfiyum Sol k'adooh Sol k'andék ba imbi ñambúuñuraño. Bampút, ajellihineeniñ Sol k'atifureeniñ mara Sol anfégayfegay ingi Umuyhintor f'anane

hadéko ba Damas ki Umuyhintor
abúuñantam. Angu na Baranabas
atéekineeniñne ni Sol akawandinne
jamanku Damas a gurethu Yensa ki ganay
kawando gara anáknákáh, gara adéwuneh.
Angu fo Baranabas atéekineeniñne
h'ayikne imbi Sol ingi ho Sol akanne,
ñanfiyunku Yensa mi Jerusalem anlóki
k'ambabay ingi úmár.

Kanda Sol, f'atéekinne Ñanyahudo
m'angune Jerusalem mara inini,
afiyumfiyum Yensa, alah mara Yensa ingine
Úbáku Díino m'adékirne a duniyaño
k'apahun mintor a jínubonkintor,
f'anyennehinne ho Sol alóbne, ansíibáásiib
bubujhunom. Angu, ñanfiyunku Yensa
banyennehini mara ayikyik m'ansíiba
bubujhu Sol, andékirem ba a pooro n'agune

a bukooro b'aretuhne Sesariya k'anyéjem
adooh batongo agír a bukooro b'aretuhne
Tarsu.

Kanda ayikyik bísiba, Baranabas adékdek
baman Tarsu k'atíb Sol. Ayikyik doho
n'asíiba ki Sol akaan.

Jantenteŋ Gúloku Díino.

²⁵ Afúrumi na, Baranabas afúrumor
Antiyos k'adék baman bukooro
b'aretuhne Tarsu ba gútibhu
utaalibeŋo m'aretuhne Sol. ²⁶ Bapút
Tarsu atíbem fo adék adanunam
k'adoorom ba Antiyos. Bampútri
annooh na buruhu díin
k'ankawandineh m'angune a
dayrahu Yensa m'angune na. Agida
m'anjógohne na bujantenku

kawando anrumunrumun tip.
Ñanlabahi anfaɲunum n'ampájul
binaahu Yensa a gubaarhu
kawandhinin. (Acts 11:25-26)

Angu Sol ingi Baranabas ankawandkawand
m'anfiyumne Yensa m'angune Antiyos.
Dayrahu ñanfiyunku Yensa mi Antiyos adék
f'anyik sembe.

Inini jantenteɲ Gúloku Díino k'uyennehineɲ
h'awusunane imbi m'anfiyumne Yensa
Antiyos.

¹ Afúrumi na, ayikyik ñanfiyunku
Yensa m'angune a bukooro
b'aretuhne Antiyos bu resiyonku
Siri. Agida na, imbi immerenɲ
m'antohne a dayrahu Yensa ayikyik
anabiyonɲo ingi índiigeen índukon

m'ankawandah Gúloku Díino.

Harethinin ingine inha: Baranabas
ingi Simiyon m'ayéjuhne Urahayo
ingi Lusiyus m'afúruntne Siren ingi
Maneyan m'akunaane ingi Herod
Gúfánááro ingi Sol.

² Ayikyik bísiba bi nip anjóg k'anḡay
buramunku Umuyhintor k'anḡay
sumo. Angu f'anḡane buramunku
Díino, Jamméejhu Díino Jarenninno
ayéjeeniḡ:

- Baranabas ingi Sol

icaabeneeniḡcaaben k'andék bíduk
ankaan dohoḡo n'ésiibane k'ankaan.
Inini, kuku úfunneeniḡ a binanan
k'ampiren andék ankaan dohoḡo
nómár.

³ Angu, banyennehini hómár sumo badéti, andék andoohor Baranabas ingi Sol k'anlóbunduteeniḡ halakánin pur k'anduwareeniḡ. Banduwareeniḡ mees angu ambénneeniḡ k'andék ankaan dohoḡo no Díino asíibane k'andék ankaan.

⁴ Nim Jamméejhu Díino Jarenninno abúuñne Baranabas ingi Sol k'angu andék baman a bukooro b'aretuhne Selusi. Bampúti andék ba pooro andék anḡaf a batoḡo k'andék baman a didiirahu Sípár. Agida Sípár agune a bájegenenku jakaamo.
(Acts 13:1-4)

Angu jamméejhu Díino Jarenninno ajellihinjellihin m'anfiyumne Yensa Antiyos

mara acaabencaaben Baranabas ingi Sol
k'andék imbi siyeŋo adúkoŋo
k'antéekineeniŋ kúmbuuñaamo
kúnsuuminno a gubaarhu Yensa. Úfegen,
Díino asíibáásiib ki jamanku siyeŋo nip
anyennehin Kúmbuuñaamo Kúnsuuminno.
Gúmár akanne Yensa atéekinteen
ñantaalibehinem ayéjeeniŋ, «Údeken a
duniyaŋo nip k'úteekineŋ siy noŋon noŋon
kúmbuuñankum.»

Gúmár akanne mint íbenermiŋ bukokint
k'ídekermiŋ imbi búteekinkinan
Kúmbuuñaamo Kúnsuuminno. Úfegen,
Díino asíibáásiib ki Ñanñaamolo,
Ñammandiŋo, Ñanriyaaro, siyeŋo nip
anyennehin Kúmbuuñaamo Kúnsuuminno.

Angu Díino acaabencaaben Baranabas ingi

Sol ki immeren ambúuña Gúloku Díino
k'andék. Andékdek baman a jakaamo
adénno k'anyifa a batojo k'andék baman a
bukoku Sípár. Na gantéekinne jamaño
Kúmbuuñaamo Kúnsuuminno.

Jantenten Gúloku Díino.

⁵ Angu bampút Sípár andék ba a
bukooro b'aretuhne Salamin.

F'ampútne Salamin anton hadéko a
jaame nojon nojon k'ankawandin
na. Agida údiigeeno m'aretuhne San
Mak úmár aṇáábineeniṇe
k'akááñinahinkeeniṇ a dohojo
nómár. (Acts 13:5)

Angu, San Mak, m'aṇáábinne Baranabas
ingi Sol, úmár ingine údiigeeno m'añaañne
Injilhu Mak. Iniman Ñanyahudo jup a

waato nómár ayikyik haret hanak. Gureto guhebáronjo ingi gureto guwitaliyano. San ingine gurethinem guhebáronjo, Mak ingine gurethinem guwitaliyano. Angu Sol mees ayikyik haret hanak. Sol ingine gurethinem guhebáronjo, kanda gurethinem guwitaliyano ingine Pol. Angu, biriman waato nómár, Luk, m'añaañne líibáro inno a Gúloku Díino gareteret Sol, Pol, gurethinem guwitaliyano.

Jantenten Gúloku Díino.

¹³ Angu Pol andék anjaf a bato adúk a pooro no Pafos ingi m'ankokayne nip. Anfúrum Pafos andak anjuc jakaamo adénno k'andék a bukooro b'aretuhne Perega. Agida Perega bukoor búduk b'agune a resiyono

n'ayéjuhne Pamfiliya. Angu bampút
Pamfiliya Sanj Mak
m'anjáábineeeniṅne ahoobálaheeniṅ
na k'anjoolin ba Jerusalem. ¹⁴ Kanda
índukoṅo m'ankokayne ingi
Baranabas ingi Pol anfaalen.
Anfúrum Perega k'andék f'andék
ampút a bukooro b'aretuhne
Antiyos. Antiyos nómár, nómár
agune a resiyonku Pisidi. Bísibahu
guyohálaṅo andék k'anlahun
índukoṅo a jaameṅo k'annooh na
ingi immerenṅ. ¹⁵ Angu dam mi
jaameṅo banliirey hóbido hóduko ho
Tawrato ingi hóbido ho
anabiyononṅo, ñanlaameku jaameṅo
ambúuñ wúur k'ajoofun Polonṅ
ayéjeeniṅ:

- Índoonenenkint, aji ininkaman ayik
h'ódekenne bubecindikint jamméej,
waato apútpuť.

¹⁶ F'alóbne nim mees Pol akeng.

Bakengi amal buruhunom ki jamaño
ambéntendem. Bankotay nip
ayéjeeniŋ:

- Ninkinan jamankum mi Israyel ingi
ninkinan índukoŋo m'útuyhoŋne
Díino, béntendeemuŋ
baŋ.....

³² Angu inini, agi úfegen ídekrimiŋ ba
a binanan, búteekinkinan
Kúmbuuñaamo Kúnsuuminno
gídekuntumminne. Agida ho Díino
ajíkirindne maamaamankintor

Ñanyahudo fam maro adék
akankáneh, hómár agune na a
kúmbuuñaamo kúmár. ³³ Inini kúmár
apúturne gub a binanan imbi
ninkinan m'úfurunteŋne a muhenku
Ibrahiima ingi ninkinan mees mu
guyroŋne Ñanyahud. Úpájuleŋ, fo
Díino akengunne Yensa a biniironjo,
fam gakandurne mintor h'ajíkirindne
fam maamaamankintor. Janteneŋ
baŋ ni Díino alóbne a Bákimo
banakinno. Na inini gayéjne Úbárám:

Maŋ fi ugune Úbákum.

Bísibaŋo bi gub me igune Bááhán.

Nim Díino alóbne fam a gubaarhu
Yensa ki anabiyonjoŋo andooh
k'anñaañ.....

³⁸⁻³⁹ Kanda, ninkinan

índoonenenkint, ísiibáámiṅsiib
k'úpájálán arenṅ maro a sabaabhu
maṅ úmár, m'aretuhne Yensa Díino
apireṅne akafari jínubonkintor. A
baraku úmár gipireṅkineminne
ikawandimiṅ kúmbuuñaamo unku.
Moṅon moṅon afiyumne Yensa,
Díino akafari jínubonkon. Ningen
baṅ! Gúbuuñahu a Luwaṅanku Musa
n'anéeroonuṅne dapireṅ akaan ki
wúur apah a jínubonkunom. Kanda
gufiyunku Yensa apireṅkinehne
akaan ki Díino akafari jínubonkon.

(Acts 13:13-16, 32-33, 38-39)

Angu, iniman jamaṅo jup, Ñanyahudo mees

anlah mara aji ambúuñay luwaṅanku Díino, gúduko ampakáneh a jínubonkánin k'andék arijanna. Kanda Pol ayéji, «Gúbuuñahu a luwaṅanku Musa n'anéeroonuṅne dapiren akaan ki wúur apah a jínubonkunom. Kanda gufiyunku Yensa apirenkinehne akaan ki Díino akafari jínubonkon.» Angu, horan akanne ayéj nim? Nim gayéjne mara haman úbuuña Luwaṅanku Díino jup, ayikhineh Luwaṅanku Díino n'ójegunkunehne. Angu moṅon moṅon asohálasohála ki Díino apahánam a jínubonkunom n'ayikne. Díino abúuñribuuñ wúur úmánduk k'adék acaam jínubonku ñanraagofonjo ki Díino apiren apahuneeniṅ. Úmár ingine Úbárám Yensa. Gúmár akanne gufiyunku Yensa bareṅ apirenkinehne akaan ki Díino akafari jínubonkon. Angu nim Pol atéekinne jamaṅo

m'angune Antiyos.

Jantenteŋ Gúloku Díino.

⁴² Pol babollay balóbo ansali f'andék andétun. Angu Pol ingi Baranabas anfúr a jaameŋo. Banŋay gúfuro anyéjeeniŋ k'anŋooliner bísibahu guyohálaŋo bidiinem. Anŋoolinerdir ambocindeeniŋ kawando n'ankawandineeniŋne dam. Nim gankiinaheeniŋne. ⁴³ Kanda bambollay dam salinŋo ayikyik jamaŋ ñanlabahi m'antif Pol ingi Baranabas. Imbi immerenŋ índukonŋ anguy Ñanyahud m'anfúruntna a muhenku Ibrahiima. Índukoŋo anguy m'antúubone anguy Ñanyahud. Pol ingi Baranabas

ammincineh gúteekinkinin maro
aññantay anlah aliñ bufiyunku
kabonkerhu Díino.

⁴⁴ Afúrumi na, bísibahu guyohálajo
gañoolinti, Pol ingi Baranabas
aññooliner ba a jaameño. Kanda
dam jamanku bukooro anaman
anlitiñaylitiñay hadéko ba na a
jaameño. M'andékirne ba
bujantenku gúloku Umuyhintor gu
Pol ingi Baranabas ankawandinehne
anrumunrumun na tip. ⁴⁵ Kanda
Ñanyahudo índukoño banfégi ni
jamaño anrumunne bujantenduku
Pol ingi Baranabas anyik kenkaare
k'apaareeniñ. Ankomb buñophu ho
Pol alóbohne k'ansutunkom. ⁴⁶ Pol
ingi Baranabas banyennehini

h'anlóbheeniŋne anwaala ni
benihireŋe, anyéjeeniŋ:

- Ninkinan! Aji úfegen
n'inohumminne ídekermiŋ
gukawandinkinan maro ninkinan
Ñanyahudo giñantaminne íteekinmiŋ
guliih Gúloku Díino. Angu maŋ nim
gikaanminne. Kanda ninkinan
n'uñopeŋne Gúloku Díino, akankaan
ininkaman ninkinan bádoŋ gujaku
kanjébo ka bandór. Kanda inini,
n'ucucuneŋne Gúloku Díino,
k'úbennahaŋ na, k'ídekmiŋ ba imbi
mi guyroŋoŋne Ñanyahud. ⁴⁷ Ningen
baŋ! Umuyhintor abúuñáribuuñ
mint. Anabiyonŋo añaañaañ ayéj:

*Ikaanenkaan k'uguy jiyaan
j'ayaanárinkinehne siyeño nip.*

*Jiyankan adékhineh a duniyaño nip
tonkon ingi tonkon*

*ki nim anyennehin
n'ampirenkinenehne ampah a
jínubonkánin.*

Nim Pol atéekineeniñe. ⁴⁸ Angu mi
guyronoñe Ñanyahud banyennehini
a gúlobo gu Pol alóbne asewoheeniñ
dáde k'ankomb gudanko ni gúloku
Umuyhintor asúumne. Angu mi Díino
acaabenne bujaku kanjébo ka
bandór ankomb bufiyunku Yensa.

⁴⁹ Angu afúrumi na gúloku
Umuyhintor apas a resiyonku Pisidi
nip. ⁵⁰ Kanda ayikyik Ñanyahud

m'anguy (a bukooro búmár,
b'aretuhne) Antiyos, m'anñuumul a
gubaarhu Pol ingi Baranabas. Andék
imbi indikaamo m'anyikne kunyiko
ingi ñanlaameku bukooro
k'anjundinahineeniṅ ingi immerenṅ.
F'ankanne nim jamaṅo ankomb
gúfegunkinin f'andék anfúnneeniṅ a
resiyonṅ nómár.

⁵¹ F'antibaareeniṅne, Pol ingi
Baranabas ankandáreeniṅ tamaaser.
Tamaasero ámár agune anfaah
hádikinin didiiraṅo d'akotne f'arenn
fet. K'angu anfaalen f'andék ampút
a bukooro b'aretuhne Ikoniyum.

⁵² Kanda m'anfiyumne Yensa a
bukoku Antiyos no resiyonku Pisidi
ansewosewo dáde n'anyennehinne

Kúmbuuñaamo Kúnsuuminno. Díino
akucundeeniṅkucund Jamméejhinem
Jarenninno f'arumun a
jamméejenkinin. (Acts 13:42-52)

Angu índukoṅo m'angune Antiyoṣ
anfiyumfiyum Yensa k'antifilinem k'anguy a
binaahu Yensa. Kanda Ñanyahudo
índukoṅo anfoyfoy Gúloku Díino gu Pol
atéekineeeniṅne. Anfoyfoy Yensa k'anton
buyehenku m'anfiyumne Yensa. Angu
Ñanyahudo m'angune Antiyoṣ
anyehenyehen Pol ingi Baranabas dáde
f'andék anfúnneeniṅ a didiirahánin.

Angu aléleer dáde imbi Pol ingi Baranabas.
Kanda immerenṅ búuñooroṅoṅ,
ṅoolintárenṅ ba gúṅuño, kotaaraṅaṅ
n'ambenuhne búteekinku wúur Gúloku

Díino. Immereŋ, bantíbareeniŋ a bukoor
búduk anfak andék a bukoor búduk
k'antéekin jamaŋo benen Kúmbuuñaamo
Kúnsuuminno.

Jantenteŋ Gúloku Díino.

⁸ Angu, ayikyik bísiba bi Pol ingi
Baranabas anguy a bukooro
b'aretuhne Lísátará. Na ganlahunne
údiigeen mu hádiho afoyne káriman
f'abosaane. ⁹ Angu dam, fo Pol
aŋane kawando údiigeen
ajantendikem hóbun. Pol akorosom
k'agune bujantendikinem k'apájul
maro údiigeen afixumfixum Díino.
Bafégi hómár alah maro Díino
apirenkineh ajébinem. ¹⁰ Alób
wanlaŋ ayéj údiigeen:

-Fi! Kenger k'uwonn k'úwuuh!

Údiigeeno akeng jembireñ k'atunul
hadéko. ¹¹ Angu jamaño mañ ni
anrumunne tu banfégi ho Pol
akanne, ankomb balóbo ingi
gúlokánin gulaykani k'ampeegeh
anyéjayeh:

- Je! Ingah! díineño ankucrikuc
anguy ñanraagof k'andéker a
binentor!

¹² Angu anyéj Baranabas ingine
dínkinin n'aretuhne Seyás. Agida
Seyás agune dínkinin a binanin
n'afañumne n'ayik sembe. Angu
anyéj Pol agune úgáátunduku Seyás
m'aretuhne Heremes, maro úmár
galóbolob dáde. ¹³ Agida ayikyik

alimaamo n'aramunahne dínkinin
n'aretuhne Seyás te dígo
n'anramunkamne inno na a
burukumbanku saariño mañ na ka
jamaño anjógne. Bafégi ni údiigeeno
ajébunaane adék atíbilar ahayaño
ingi fúlááraño k'adék adoohor ba a
burukumbanku bukooro. Nim
gakanne dam maro úmár ingi
barumuno b'angune na ansíibáásiib
bubujuku Pol ingi Baranabas leeya.

¹⁴ Inini, ñambúuñuraño, banfégi
n'ansíibane bukaano súumáreeniñ fo
immereniñ inako anlah hasolhánin
ambic k'angír a barumuno búyejhinin
biki ankaan nim. Ampeegeh
anyéjeheeniñ:

¹⁵ – Índinenkint, horaŋ akanne
k'ukaanəŋ ineen? Dahu ubujuron
mint leeyəŋo! Mint guyrimiŋ díineŋo
iniman n'oramunkəŋne. Mint
ñanraagof maŋ ni ninkinan. Mint, a
gubaarhu Kúmbuuñaamo
Kúnsuuminno gídekuntumminne
nanka. Idékrimiŋdek k'úteekinahan
k'úkubulon jamméejenkánan imbi
Díino no Bandór k'úbennenəŋ hafaaso
h'oramunkəŋne ho yikireŋeŋne nafa.
Ámár ayabne raafə ingi réeŋo ingi
jakaamo ingi hoŋon hoŋon h'agune
na. ¹⁶ Fam Díino gabénnebenn siy
noŋon noŋon k'antifeh anaalaŋo
n'ansíibane. ¹⁷ Kanda haani maŋ nim
gajellihinkeeniŋjellihin maro ámár
inno bim a gubaarhu hójooninno

h'akandikeeniṅne. Hómár agune,
gabúuñuthoonuṅbuuñur kalubo
k'ufachaṅ ufatahaṅ bídimereno.
Hómár tu gakandukoonuṅne
k'upireneṅ uyaahálahanṅ k'usewohonṅ
baman a hafitenkinan. Te hómár nip
gakandukoonuṅne ki nim upireneṅ
uyikeṅ séed maro ámár Díino inno
na.

¹⁸ Nim Pol ingi Baranabas ammajane
balóbo, kanda haman nim hotir
afallane k'ambujureeniṅ leeyanṅo.

¹⁹ Angu waato nómár ayikyik
Ñanyahud índukonṅ m'anfúrumor
Antiyos n'agune a resiyonku Pisidi,
ingi índukonṅ mees m'anfúrumor
Ikoniyum k'andéker anrah na. Angu
f'anrahne na anṅay

bujundinahinkinin ingi Polonj. Angu
anlób f'andék ampireneeniñ. Angu
barumuno buruhu k'anlah gúloku
Polonj anlah gu Ñanyahudo. Angu
andooh bawaalo k'anñay bugiku Pol
k'angiihem f'andak akaan ininkaman
aniironiirro. Anlaham ambáásinem
anfúnnom a saariño. Ñanfiyunku
Yensa antifeeniñ ba na. Fo
Ñanyahudo anlahne maro Pol angu
akuckuc ambéndirem bim.²⁰ Angu
ñanfiyunku Yensa antógun na
k'ambáásinne Pol. Angu Pol akeng.
Bakengi atuñul hadéko ba a saariño.
Gucunkunom Pol ingi Baranabas
anfúrumor Lísátará k'andék ba a
bukooro b'aretuhne Dereb.

(Acts 14:8-20)

Angu jamanku Lísátára, f'anfégne ni Pol
ajébunne údiigeeno immeren anlah karo Pol
ingi Baranabas ingine díínejo. Anret
Baranabas Seyás. Ámár ingine díino no
jamanku Gáres n'afanumne n'ayik sembe.
Anfak anret Pol Heremes, díin adúk no
immeren ambúuñahne. Jamaño anyéji, «Je!
Ingah! díínejo ankucrikuc anguy ñanraagof
k'andéker a binentor!» Kanda Pol ingi
Baranabas anfacfac hasolhánin. Úfegen,
Ñanyahudo mi famo, aji wúur apuñi
gurethu Díino, wola wúur aniirohi, wola
súumáreeniḡ, anfacora hasolhánin
gujellihinku jamaño mara súumáreeniḡ. Pol
ingi Baranabas, ñanraagof bareḡ.
Síibaaraḡaḡ ki jamaño ambúuñaheenḡ
iniman n'ambúuñahne díinenkinin.
Ansíibáásiib ki jamanku Lísátára ambén

búbuuñahu díinenkinin k'ambúuña Díino
amánduko no marigeno. Angu Pol
atéekineeniŋteekin a gubaarhu Díino
amánduko n'ayabne mintor.

Úfegen, Díino asíibáásiib ki jamanku nanka
mees ambén búbuuñahu fáguhonjo,
k'ambúuña Díino amánduko. Kuku úbenen
búbuuñahu fáguhonjo, k'ufiyumen Yensa ki
Díino akafari jínubonkánan. Fáguhonjo nip,
a gúbidhu Iblisa gangune. Ganjodojod
jamaŋo. Bénten gúbuuñahu fáguhonjo
k'ufiyumen Yensa, k'ufiyumen Díino
amánduko.

Kanda Ñanyahudo m'angune na ankankaan
ki jamaŋo anfoy Gúloku Díino gu Pol
atéekineeniŋne k'ankomb bupadhu Pol
bawaalo fo anlah karo aniironiiro. Kanda

Pol niiroron! Akengkeng k'aŋoolin a bukooro. Gucunkunom afak adék a bukoor búduk k'atéekin índukonjo Kúmbuuñaamo Kúnsuuminno. A, Pol benihirenj jamaŋo. Benihirenj jimalo, benihirenj biniironjo. Apápájul mara añantay atéekin jamanku siyeŋo nip Gúloku Díino. Haani jamaŋo ammalam. Haani ni jamaŋo ambujom, añantay akaan ho Díino atéekinemne k'akaan. Añantay atéekin jamaŋo kúmbuuñaamo kúnsuuminno a gubaarhu Yensa.

Jantentenj Gúloku Díino

²¹ Pol ingi Baranabas f'ampútne a bukooro b'aretuhne Dereb ankomb na bukawandinku jamaŋo Kúmbuuñaamo Kúnsuuminno

f'andék anfiyum Yensa. Ayikyik na
ñantaalibe m'anrumun tip a
gubaarhu kawandhánin. Adékiidek
Pol ingi Baranabas anlah buṇoolin a
akooroṇo n'anfúruntné. Angu
anfúrum Dereb k'anṇoolin ba
Lísátára, k'anfúrum Lísátára andék
Ikoniyyum. Anfúrum Ikoniyyum andék
Antiyos n'agune a resiyonku Pisidi.

²² A bukoor boṇon boṇon b'andékne
ambocindeh ñanfiyunku Yensa
jamméej k'ampiren anfanunum
n'anfiyumem. Ammajah
búteekinkinin k'anfiyum Yensa
baman dagurumaaren, biki anṇoolin
mángáár. Anyéjeheeniṇ:

- Mintor m'infiyumone Yensa
inñantahon immuñahon a kunyohono
jup binñanumon maasayahu Díino.

Nim Polon antéekineenigne. (Acts
14:21-22)

Angu, hóge butifilinku Yensa aléleer
nanka? Gúduko aléleer. Kanda biriman fam
butifilinku Yensa aléleer. Imbi Pol, imbi
m'anfiyumne Yensa a waathu Pol, baman
imbi mintor nanka, gúduk butifilinku Yensa
aléleer. Jamaño ganyehuneyehun
m'anfiyumne Yensa. Úfegen, Iblisa
síibaaran ki jamaño anyennehin
kúmbuuñaamo kúnsuuminno a gubaarhu
Yensa. Iblisa síibaaran ki jamaño anfiyum
Yensa. Iblisa síibaaran ki Ñanñaamolo
anfiyum Yensa.

Kanda aji ufiyumfiyum Yensa, lahar
binaahu Yensa alinj! Úfegen, maasayahu
Díino afañánaháneh maasayahu Iblisa.
Iblisa ingi jamankánam, ayikhineh bísiba bi
Díino aworháneeniñ nip a kuulo. Kanda
jamaño m'anfiyumne Yensa, jamaño mi
Yensa apahunne, haani aléer a duniyaño
inno, afero mara anguyhuneñ bandór a
gúbidhu Yensa arijanna. Gúmár akanne Pol
atéekinteekin m'anfiyumne Yensa
k'anfiyum Yensa baman dagurumaaren,
biki anñoolin mángáár.